

Альберт Ванев

МИ ОЛАМ  
СИКТЫН




## ТУЛЫС

Шонді быд лун кутіс качны  
Вылө-вылө.  
Пышйис сылөн төвся унмыс  
Ылө-ылө.

Визувтöны-вильшасьöны  
Вöрса шоръяс,  
Нырö мыччöмаöсь талун  
Кыз пу коръяс.

Гөн да вольöс шоньд позйö  
Чикыш вайö.  
Талун медводдзаысь кывлім  
Колипкайöс.

Öшка-мöшка югыд кисö  
Мыччис юлы.  
Войвыв муö, чужан сиктö  
Воис тулыс!





## СЫРЧИК

Потш выlö пуксис:  
«Чик-чик, чи-рик!  
Аддзанныд менё,—  
Ме өд — сыр-чик!»

Висьталіс сійё:  
«Чирик-чик-чи,  
Кылалас регыд  
Ю вылысь йи!»

Сырчиклы радёсь  
Пёрысь и том —  
Көдзыд лун-войлы  
Воёма пом.

## МИ ВӨЧАМ ЗАРЯДКА

Физзарядка он кө вөчөй,  
Шуам тiянлы ми стөча:  
Быд көдзыдысь кынманныд,  
Да и ньөжйö быдманныд.

А ми воккөд кыкөн  
Ог на вой пикö:  
Мед көть жар, көть көдзыд,  
Физзарядка вөчам —  
И ог висьлөй ми,  
Ёнөсь кок и ки!





## ГОЖӖМ

Зарни шонді, югыд шонді  
Шоръяс косьтіс.  
Берегдорса пӧрысь козйӧс  
Унзіль босьтіс.

Вежсис мӧдлапӧвлӧн паськӧм —  
Быдмис турун.  
Войтыр кийн пелька ворсӧ  
Коса-куран.

Миян бать-мам уджалӧны  
Быд лун сӧрӧдз.  
Аддзан, берег пӧлӧн сувтіс  
Кымын зорӧд!



## СЭТӨР ЛИБӨ ПЕТШӨР?

Быд асыв юалö Тая:

«Мый талун ваян, мама?»

«Баблысь кö кывзысян —

Сэтөр.

Он кывзысь —

Вая петшөр».

Тая лючки-бура

Киськалöма лук.

Сетыштöма турун,

Мед эз тшыгъяв кук.

Котöртлöма шорöдз,

Кötödöма корось,

Чышкöма быд жыр,

Кытчö кöть он пыр.

Юалö рытъявыв Тая:

«Мый талун вайин, мама?»

Мамыслөн нюмыс сэк петис:

«Вайи со, нылук, сэтөр!».







## БӨРДЫСЬ-НЯРГЫСЬ

Ичөт Кимлөн сэтшөм сям —  
Пыр мед мамыс орччөн.  
Видз вылө кө мөдас мам,  
Бөрддзас Ким: оз кольччы.

Ачыс — ичөт, гөлөс — ёсь:  
«Мамө, мамө, сьөрсьыд босьт!»  
Өтчыд сэсся мамыс  
Жальсьыс, либө скөрссьыс  
Нуөдис видз вылө  
Кимөс аскөд сьөрссьыс.

Мунігас нин мудзис Ким,  
Мунігас нин вазис син.  
Эз кө эськө ачыс вөтчы,  
Важөн сыркъялөмөн бөрддзис.

Миян Ким өд зэв на ичөт,  
Оз төд мездысьнысө кыдзи,  
Курччалисны лөдз и ном:  
Воас оз-ө лунлы пом?

Бара бөрдө-лябө Ким,  
Бара сылөн вазьөм син.  
Лоис вайны сиктө  
Зонмөс пестер пытшкын.

Ичөт Кимлы көть и шог,  
Тшөтшъяяслы серам...  
Но өд сылөн мудзис кок,  
Мый нө сэсся керан?!





АР

Шонді оз нин ассьыс югөр  
Соддзён кояв:  
Енэж нюмъявлө и бөрдлө —  
Ар нин воис.

Сідзи нюжөдчөма ыбын  
Воом рудзөг —  
Он кө кок чунь йылад сувтлы,  
Шеп он судзөд.

Йөзыс видз вылө оз лэччы —  
Ыбө кайө.  
Колө тэрмасьны: оз виччысь  
Урожайыс.

**АДДЗЫСЬЛЫТӨДЗ,  
ЛЭБАЧЬЯС!**

Тэрмасьоны лэбачьяс  
Мыйон воас ар:  
Сэтчө найо муноны,  
Во чөж кӧнi жар.

«Ветлӧй лючки-бура,  
Дзодзӧг, юсь и тури!  
Сӧмын эн жӧ вунӧдӧй  
Ассьыд чужанiнтӧ,  
Ставныд шоныд тулысын  
Локтӧй миян сиктӧ!»

## СПУТНИК

Лэбзьö спутник:  
«Пик-пик-пик!»  
Аддзö менсьым  
Чужан сикт.

Да и ме тшöтш  
Аддза сійöс,  
Чолöмала  
Веськыд киён.

Спутникыслөн  
Ыджыд эбöс,  
Öдйö-öдйö  
Сійö лэбö:

Гашкö, кывбур  
Лыддигкості  
Москва карсянь  
Татчöдз локтіс.

## ТӨВ

Шоча петавлө вөр весьтө  
Дышмөм шондi.  
Дыр оз серав ланьтөм вөркөд —  
Узьны пондiс.


Еджыд эшкынөдiс вөрсө  
Гөн кодь лымйыс.  
Кытчө усйысисны өнi  
Чардыс, гымыс?

Вына трактор мургигтырйи  
Лымйөд собө:  
Вөрысь кыскөм керлөн лыдыс  
Быд лун содө.



## ЙИА КЫР


Эм кө сиктын йиа кыр,  
Челядь чукөр сәні пыр.  
Петя ислалө конькиөн,  
Ичөт каньсө кутө киын.  
Геня водіс пөвтор вылө —  
Увлань юрөн гургө-кылө...  
Сөмын Вова, лёк көть бур,  
Мем пө нинөмтор эз сюр:  
Лэдзалөма шапка пель,  
Верзьөмалөма портфель.



## ДАДДЯ ПОЕЗД

Лөсьыд жö нин  
Төвся лун,  
Чужом вылын  
Ворсö нюм.

Даддя поезд  
Корö туй:  
«Кежой, челядь,  
Ту-ту-ту!»




## КОР ЫВЛАЫН КӨДЗЫД...

Төвся көдзыд рытө  
Өдйө гортад пыр —  
Оз позь ылө мунны:  
Кынмас кок и ныр.

Пөрысь пөчным төдө  
Уна-уна мойд:  
Висьталас көть помся  
Сө ветымын вой.

Паччөр вылө каям,  
Шоналыштас кок...  
Век көть мойдөм кывзы,  
Оз кө унмыд лок.





6 коп.

ДЛЯ МЛАДШЕГО ШКОЛЬНОГО ВОЗРАСТА

*Альберт Егорович Ванев*  
**МЫ ЖИВЕМ В ДЕРЕВНЕ**

на коми языке

Рисунки Р. Ермолина  
Обложка М. Безносова

Редактор В. Попов

Техн. редактор А. Жилина

Сдано в набор 1/VIII-1963 г. Подписано к печати 7/X -1963 г. Формат 60×84<sup>1</sup>/<sub>16</sub>.  
0,5 бум. л. 1,0 печ. л. (Уч. изд. л. 1,3). Тираж 3000. Цена 6 коп. Заказ № 3719.  
Коми книжное издательство. Дом печати.

г. Сыктывкар, Республиканская типография Полиграфиздата Министерства  
культуры Коми АССР.

**КОМИ КНИЖНОЙ ИЗДАТЕЛЬСТВО 1963**